

Sachsen oder Ost Landt werden bey allen Völkern der Welt grosse Thaten aufrichten/ vnd erlangen treffliche Ehre/ vnd werden grosse/ mächtige vnd gewaltige Sieg vnd Victorien haben: beydes zu Landt vnd Wasser mit iren Kriegshelden/ von denen sie außgeschickt müssen seyn. Warumb müssen sie außgeschickt seyn? Könnte man es nicht wehren? Könnte es dann nicht der Kayser? Könnte es dann kein König? Könnte es dann kein Fürst? Könnt es dann kein Statt wehren: oder verhindern? Hie fielen mir solche Gedancken eyn: Sihe/Sihe/es ist kein Mensch jetzt auff Erden/ der Königl. vnd Fürstliche Gublüth versühnen vnd stillen Könnte/ daß nit durch Europam solte vnd müste ein grewlicher: vnd vn-menschlicher Krieg werden: (hie fiel mir eyn/ zwischen diesem 34. Jar) wann gleich alle Könige/ alle Fürsten/ alle Potentaten/ alle Stätt in Europa jetzt beysammen weren/ So ist es ihnen vnmöglich/ ein rechten Accord/ Friede vnd Stillstand zu machen/ vnd zu halten. Gott will es also gehabt haben/ vnd will alle Gottlose Menschen straffen/ die jetzt mit dem Pappst buhlen.

Ein Mensch ist schon geböhren/ der Frieden/ vnd einen gewaltigen Stillstand machen wird/ darvon sich die ganze Welt vor ihm entscheyen wird. Seine gewaltige Thaten/ Ordnungen vnd Statuten werden bleiben biß an der Welt Ende/ vnd alle Völker auff Erden werden sie rühmen/ auch wird Er allen Kotten vnd Secten ein Ordinanz machen/ vnd zu der Zeit wird niemand mehr vmb der Religion willen verbrant werden. Hie fielen mir diese Gedancken eyn: Dieselbigen Statuten vnd Priuilegien sollen wehren biß zum jüngsten Tag: so bald als dieselbigen Statuten werden widerumb von Menschen angefochten/ soll der Tag des H. Erren nicht weit seyn. Hie fiel mir eyn/ das Wort kein zum beschluß: Sela..

### Vom zukommenden neuen Kayser..

Diese Gedancken kamen mir in mein Herz vom Schöpffer Himmels vnd d' Erden/ vnd Gott sprach zu mir im Geist: wie mich däucht/ Schreib auff jetzt der Welt: Sihe/es kompt die Zeit in Teutschlandt/ daß ich viel Bawren/ Burger/ vnd vom Adel/ auch gewaltigsten der Ritter: